



# E-POLITIKA (ili šta je Snowden Bosni...)

Dragi moji, s obzirom na to da smo svi manje više u niskom startu prema nekoj morskoj destinaciji gdje bi trebali malo dahnuti dušom, s obzirom na to da je količina rahatluka Bosanca i Hercegovca obrnuto proporcionalna količini domaće štampe kojom ispira mozak svakoga jutra, neću vas pretjerano opterećivati. A neću govoriti ni o našoj situaciji, sve u namjeri da vaš, a Boga mi i naš odmor što prije počnemo.

Pričat ću dakle o momku koji je, mada mnogi toga još nisu svjesni, ušao u historiju ljudskog roda žrtvujući vlastiti mir zarad pokušaja odbrane slobode, onakve kakvu je vidi i doživljava moja generacija. Riječ je naravno o Edwardu Snowdenu.

Momku koji nam je zorno predviđao da Orvelova 1984. nije ograničena na neku ideologiju, pa ni komunističku kako se to tada shvatalo, već da je ono što *Velikom Bratu* treba da postane Velik - strah i tehnologija. A Amerika kao Amerika, ništa ne zna na malo, tako da proizvedenog straha kod svojih građana ima koliko hoćete. Tehnologije pogotovo.

Čak toliko da je jedna slobodarska nacija spremna zaboraviti da sloboda ima svoju cijenu koja se, od kako je svijeta i vijeka plaćala - pa i životima. Sada su njihovi politički predstavnici rekli da je bolje biti rob nego grob, ili da je bolje da *Veliki brat NSA* zna s kim pričate, s kim spavate, koliko i gdje novca trošite, kuda se krećete nego da tamо neki *mamlaz* detonira neku bombicu i ubije nekoliko ljudi. A podaci koji vas oslikavaju tako detaljno kako vas ni rođena majka ne zna, završit će tamо gdje tajni sudija tajnog suda tajno odluči da su potrebni... Ljepota, nema šta...

E sada, kakve to veze ima s ovim našim komadićkom planete, pitate se? Ima, i te kakve. Jer, kada iduće godine počne zavrtanje ruku ovim našim političarima, a ne bi li napokon izašli iz ove BiH noćne more, mislim da će se problem prelamati kroz *PRIZMA* - u (za neupućene to je taj *NSA* program koji čita elektronsku poštu, prisluškuje telefone i Boga pitaj šta još radi...).

Ne brinite, neće ovi naši ništa pametno napraviti jer to žele i znaju, već će ako budu morali to učiniti zbog straha da pravi izgled koji daje *PRIZMA* ne dospije u javnost, a pogotovo ne do supruga...

Ostaje samo da vidimo ko će zavrtati ruke jer Holbrookea nema... ■

Aida Delić,  
glavna i odgovorna urednica